

# TIJDSCHRIFT

VAN HET

KONINKLIJK NEDERLANDSCH GENOOTSCHAP

VOOR

## MUNT- EN PENNINGKUNDE

ONDER DE ZINSPREUK

*„Concordia res parvae crescunt”*

TE

AMSTERDAM



10<sup>e</sup> Jaargang

AMSTERDAM

JOHANNES MÜLLER

1902

---

## Bouwstoffen voor eene Geschiedenis van het Nederlandsche Geld- en Muntwezen.

---

Fol. 9 V<sup>o</sup>

Munte.

Phillips Hertoge van Bourgoñ etc. doen kont allen luyden dat wy aensiende ende overmerckende den grooten hinder scade ende afterdeel die den goeden luden der voirn. lande van Hollant ende van Zeelant ende den genen die dair te verkeren hebben mit hoiren coepmanscippen ende anders an gelegen siin ende dagelicx toecommen ende geschien by dien dat wy gheen gouden munte en doen slacn in die selve lande, ende noch meer gescepen waeren te gevallen overmids dat dat gout van den landen voirscr. beyde gemunt ende ongemunt van tyde te tyde wtgevoirt wart in anderen lande hebben dair om om nut ende oirbair derselver lande bevolen, ende mit desen brieve bevelen Jan van Brabant him macht gevende te doen wercken van onser wege bijnnen onser stadt van Zevenberge pennijngen van goude in der manieren hier na volgende, Eirst enen pennijnck van goude geheten enen scijlt die houden sall in den alloy xv karate ende een halff fiins gouts u (up) die toedse ende dier sullen gaen up die troyssche marc seven ende tsestich ende een halff dair aff sal onse muntmeester hebben te remedem in den alloy een qrt (quart) van enen karate fiins gouts ende in die snede twe engelsche up elck marc wercx, Item noch sal men maken enen pennijnck van goude geheten enen

halven sc(ilt) die sal houden in den alloy viiftien karate ende een half fjns gouds up die touche als voirsch. staet ende sullen dier gaen up die troyssche marck hondert ende zes ende dertich, dair af sal hii hebben te remedem een qrt(art) van enen karaet in den alloy ende in de snede twe engelsche up elc marc wercx ende hier of sel die voirsch muntmeester ons geven ende wtreycken te sleyscat van elker marck fins gouts dat hy sal doen wercken van alden wercke van goud voirsch enen scijlt ende drie vierendeel geheten clinckairts ende al dat ander dat dair off blijft sal die muntmeester ende die coopliden houden voir hoiren cost ende arbeyt die ten wercke behoiren ende des sal hii seker ende borchtucht doen in handen onser getruwer Raid die meysters van der rekeninge in onse rekenamer tot Rijssel mer den wairdein sullen wii sine wedden doen geven van den onsen des sal onse voirsch. wairdein van elke viif hondert scijlden nemen enen scijlt van elke viifhondert halve scijlden twe halve scijlde ende alle die penningen van goude sal onse voirsch. wairdein in ene busse worpen, om assay ende proeve dair of te doen also recht ende gewoonlic is up die touche ende dair mede sal him onse muntemeester voirsch. mogen verantwoirden ende ontstaen voir ons ende onsen raide ende d(air) mede quiten wesen sonder enich ander assay of proeve in enigerwiis te doen voir ons of yemen anders. Des siin voirwairde tusschen ons ende onsen muntem. voirsch. dat van all den voirsch. remedem in aloy ende in gewichte wii deen helft hebben sullen ende onse muntemeester dander helft van also veelen als men bevinden sal mogen dat hii genomen sal mogen hebben van den selven remedem. Mer waert dat hy vorder of meer name dan die voirsch. remedem inhouden, so soude al dat gevonden wort dat hii meer genomen hadde commen ende wesen allene tot onsen behoeff dat soude hii ons wtreycken ende betalen ende d(air) mede quiten wesen sonder ons vorder enige beteringe te doen in enigerwiis, Ende ge-

vielt so dat die penningen voirsr. niet ganchachtich en waren of dat so vele billoens niet ter munten en quame dair men die voirsr. penningen of werkende mochte houden daer of en soude onse muntemeester voirsz. geen last hebben Ende geloven den selven onsen muntmr. in desen voirr̄n stucken te houden te starcken ende te bescermen als een voirst. sinen munte ende hoge heerlicheyt sculdich is te doen tegen enen ygelic die hem d̄(air) in hinderen of deren wouden. Dit sal gedueren tot onsen wederseggen. In oirconde etc. datum up ten IIIJ<sup>den</sup> dach in Decembri añō XXIX<sup>o</sup>—(1429).

Leenregister. *Commissiones Burgundiae*, 1428-1453, Cas N. Rijksarchief 's-Gravenhage.

*Medegedeeld door* FRED. CALAND.

---